

Pa aña 2019 Minister Dangui Oduber a anuncia proyectonan importante pa turismo

Ta cuminsa cu proyecto Baby y Rodgers Beach, Malmok, Alto Vista y Hooiberg



TURISMO ta keda e fuente principal di entrada pa nos pais. P’e motibo aki, ta importante pa nos mantene nos producto Aruba uno competitivo.

Pa Minister Dangui Oduber, como e mandatario encarga cu Turismo, e vision ta pa Aruba ricibi turista di calidad. Pesey e ta di sumo importancia pa keda inverti den areanan turistico y tambe inverti den infraestructura.

“Ora nos kier atrae e asina yama ‘big spendernan’ cu ta laga hopi placa atras den nos economia, ta importante cu nos producto y e experiencia cu nos ta brinda ta cuadra cu cantidad di placa cu nan ta paga pa nan estadia. E turista mester haya balor pa nan placa”, Minister Dangui Oduber a expresa.

Den cuadro di esaki, minister Dangui Oduber ta anuncia diferente proyecto cu sigur lo eleva nos producto Aruba.

PROYECTO BABY BEACH Y RODGER’S BEACH

Como un area turistico super bon bishita, Baby Beach, n’e area caminda Lone Palm Stadium ta situa lo bay conoce facilidadnan nobo manera baño, café/restaurant

y zona di recreacion. Tambe lo bay amplia e parkinglot den e area aki.

Rodger’s Beach lo haya un pier nobo y tambe lo haya facilidadnan nobo pa publico por haci uzo di dje.

PROYECTO TRAPI MALMOK

Un di Aruba su joyanan t’e area Malmok. N’e area aki construi diferente trapi

N’e costa (barancanan) p’asina e lama por ta mas accesibel pa nos turista y localnan.

PROYECTO STASHI ALTO VISTA

E kapel di Alto Vista ta un sitio hopi bishita y ta sagra-do. E ta un caminda hopi ta bin haci oracion, meditacion y hopi devoto Catolico ta haci uzo di dje. E kapel ta ser bishita practicamente tur dia pa nos turistanan y p’e motibo aki lo bay renoba e 14 stashinan di e caminda di cruz pa Alto Vista.

PROYECTO BOARDWALK MALMOK

Tanto turista como local ta haci ehercicio riba e strip di Malmok, pero no ta gosa di un seguridad optimal n’e sitio.

P’e motibo aki lo construi un boardwalk, cual lo ta di entre Fisherman’s Hut y Boca Catalina. E boardwalk lo garantiza seguridad di tur esnan cu lo haci uzo di dje. Pa construccion di e boardwalk, a tene cuenta pa por tin menos impacto ambiental posibel, dor di construi sin haci daño na naturalesa.

PROYECTO HOOIBERG

Un di Aruba su atraccionnan principal cual ta un regalo di naturalesa ta Hooiberg. E seroe aki a wordo negligha pa hopi aña y ta den mal estado. Por medio di fondonan di TPEF lo percursa pa drecha esaki.

E idea dreche y hunto cu artistanan local, crea un arte di mosaic, haciendo e area aki uno unico den su forma.